

# DARI SEBULAN KE SEBULAN

Perkara menetapkan bahawa *Chief Kadi Singapura* sahaja yang boleh menikahkan orang-orang Islam yang telah ada isterinya yang hendak berkahwin lagi – dipandang oleh sebahagian orang akan lebih memburukkan lagi keadaan masyarakat umat Islam. Umpamanya seorang suami yang bergaji seratus dua puluh ringgit. Ia hendak berkahwin lagi. Kadi menggantungkan maksudnya kerana harus ia tidak dapat mencukupi nafkah isteri yang lama dan isteri yang baru. Apabila kadi menjalankan kuatkuasanya maka kerana menurut kemahuannya suami tadi terus menceraikan isterinya yang ada. Apakah kadi boleh berbuat apa-apa ke atasnya? Ataupun ia kahwin di luar kawasan Singapura dan setelah kahwin dibawanya ke Singapura – apakah ertinya kuatkuasa ini? Banyak persoalannya yang timbul yang lebih rumit dan lebih membanyakkan perceraian. Ini ialah selain daripada perkara yang menyekat kelulusan yang diberi oleh agama kepada pemeluknya. Bahkan orang-orang telah timbul sangkaan nampaknya kerajaan Singapura harus dengan perlahan-lahan hendak mencuba membabit umat Islam supaya termasuk, sekurangnya, di dalam perkara mengharamkan kahwin lebih daripada satu.

\* \* \*

Soal perceraian nampaknya tidak sahaja mengenai bandar-bandar besar seperti Singapura, Kuala Lumpur dan Pulau Pinang, tetapi nampaknya telah melarat ke daerah lain seperti Kedah dan Negeri Sembilan. Di dua tempat yang akhir ini perceraian hampir-hampir meliputi kepada lima puluh peratus daripada jumlah perkahwinan. Menurut pendapat ini membanyakkan janda-janda dan membanyakkan pula ragamnya kepada masyarakat. Siapakah yang mesti disalahkan dalam perkara ini?

Menyalahkan satu-satu pihak atas satu pihak yang lain tentunya tidak akan memberi faedah dalam menyelenggarakan persoalan ini. Yang patutnya umat Islam semuanya bekerja mencari sesuatu jalan untuk mengurangkan perceraian di kalangan umat Islam ini. Atas ini tidak perlu diperundang-undangkan – mengadakan hukum sahaja. Yang sangat perlu bahawa di dalam tiap-tiap negeri ada suatu tubuh pendamai – orang-orang yang bekerja mendamaikan sesuatu perselisihan di antara suami dan isteri, sebelum ia pergi ke mahkamah kadi atau pergi kepada kadi untuk bercerai. Kalau orang datang kepada kadi maka kadi lebih dahulu menolak tuntutan bercerai itu. Kadi mesti menghantar orang-orang yang bercerai itu kepada golongan pendamai itu.

Ini satu ikhtiar yang pernah dibuat di Indonesia, sebelum orang-orang pergi menghadap kadi. Banyak lagi perkara-perkara yang mustahak diperhatikan oleh umat Islam. Kursus-kursus mengenai mengawal rumah tangga untuk wanita, dan kursus berumahtangga untuk pemuda dan pejabat-pejabat agama mengadakan risalah dan nasihat-nasihat tentang cara berumahtangga dengan memberi kesedaran ialah perkara-perkara yang mustahak sebagai satu ikhtiar untuk mengurangkan kesulitan di rumah tangga.

Hal-hal ini nampaknya tidak diperhatikan langsung kerana ahli-ahli kebudayaannya sibuk mengulas perkara kebudayaan sekalipun kebudayaan itu berdasarkan Hindu, ahli-ahli seninya sibuk dengan keseniannya – sedang ahli-ahli agama melupakan sama sekali bahawa semua umat Islam bertanggungjawab menyelamatkan permasarakatan berumahtangga. Beramai-ramai<sup>1</sup> perhatilah bahawa masyarakat umat Islam akan menuju kepada kehancurannya! Bertambah banyak janda, maka bertambah banyak bencananya!

\* \* \*

<sup>1</sup> Tulisan dalam teks tak jelas

Persoalan mendirikan Masjid Negara di ibu kota Persekutuan Tanah Melayu nampaknya ada menunjukkan tanda-tanda dibuat sebagai persendaan kepada agama Islam. Mula-mula wang hasil daripada loteri diminta supaya digunakan dan Tengku Abdul Rahman bersedia menanggung dosanya. Sekarang timbul lagi satu rancangan baharu mengenai hasil peraduan Bintang Radio diuntukkan untuk Masjid Negara.

Apakah umat Islam mau mendirikan rumah Tuhan dengan wang-wang syubhah seperti itu? Apakah umat Islam mau mendirikan rumah Tuhan daripada wang-wang maksiat? Adakah umat Islam akan mengadakan majlis peraduan cantik, pasar malam, sandiwara dan seumpamanya untuk menegakkkan sebuah rumah Tuhan (*bayt Allāh*) untuk tempat beribadat kepada-Nya?

Kalau dengan ini, kata orang, terutamanya orang yang beriman, lebih baik jangan didirikan masjid itu. Di ibu kota telah ada masjid-masjid. Tidak mesti ada Masjid Negara yang bermodal mahal sebanyak lima million itu kalau ia didirikan dengan hasil-hasil daripada syubhah. Orang-orang zaman jahiliah lagi tidak mau membuat rumah Allah seperti itu apalagi kita yang telah menerima Islam.

Wahai umat Islam! Ingatlah! Jika tuan-tuan buat rumah Tuhan dengan cara ini awaslah! Tuhan amat Mengetahui dan berhati-hatilah akan balasan-Nya!

\* \* \*

Kalau orang bertanya kepada orang Cina, tuan bangsa apa – mereka terus menjawab saya bangsa Cina. Kalau orang bertanya kepada orang-orang India, mereka menjawab mereka bangsa India, kalau orang bertanya kepada orang-orang *American*, tuan bangsa apa, mereka akan menjawab saya bangsa *American*, ditanya kepada orang Indonesia tuan bangsa apa, saya bangsa Indonesia, ditanya kepada orang Melayu, encik bangsa apa, mereka menjawab saya bangsa Melayu. Ditanya kepada orang UMNO – apa ertinya UMNO – Persatuan

Kebangsaan Melayu Bersatu. Ditanya kepada Tun Abdul Razak apa Kebangsaannya Persekutuan Tanah Melayu, jawabnya, rakyat Persekutuan Tanah Melayu! *Mā shā'a Allāh!* Sudah sekian lama berjuang, sekian lama berjalan pemerintahan yang merdeka sampai sekarang orang masih tak mau atau tak berani berterang-terang bahawa negeri ini negeri Melayu dan bangsanya bangsa Melayu – bukan bangsa *Malayan* yang telah dibuat acuannya oleh penjajah.

Orang-orang Melayu sangat berharap supaya pemimpin-pemimpin Melayu biar tegas berjuang dan memperjuangkan maslahat bangsanya. Mereka berharap supaya diperjuangkan bangsa Melayu sebagai bangsa – tidak sebagai kaum. Janganlah nanti bangsa Melayu yang memperjuangkan maslahat bangsanya dipandang sebagai perjuangan perkauman. Ingatlah! Jangan nanti bangsa Melayu “melaknat” pemimpin-pemimpin mereka yang tidak tegas perjuangannya.

\* \* \*

Suatu undang-undang dikatakan telah dikemukakan kepada Majlis Undangan Kerajaan Singapura mengenai orang-orang yang ada isteri, kalau mahu kahwin lagi, hanya dibenarkan dinikahkan oleh *Chief Kadi* sahaja. Syarat yang diberi bahawa ia boleh menikahkannya kalau ia berpuas hati bahawa perkahwinan itu tidak melanggar hukum syarak.

Sepanjang yang kita ketahui, pada masa-masa yang telah lalu bahawa sesuatu undang-undang mengenai orang-orang Islam, sebelum dibahaskan di dalam Majlis Undangan maka lebih dahulu hendaklah dikemukakan kepada Majlis Islam Penasihat Kerajaan Singapura. Tetapi mengenai masalah ini, sepanjang yang kita ketahui bahawa perkara ini tidak pun dikemukakan kepada majlis itu. Dengan ini, ertinya jika undang-undang itu dikuatkuasakan maka sekurang-kurangnya tidakkah lebih dahulu orang-orang Islam ditanya pendapatnya apalagi ditanya tentang bencana dan mudaratnya serta faedahnya memperundang-undangkan perkara ini.

Orang-orang Islam di Singapura yang tadinya bersyukur atas langkahan kerajaan mengecualikan orang-orang Islam daripada terkena mengikut undang-undang tidak boleh kahwin lebih daripada

satu, sekarang berasa hairan mengapa pula kerajaan Singapura cuba mencari jalan memperketatkan peraturan yang berjalan itu.

Di manakah ada hukumnya yang kadi berhak menentukan seseorang tak boleh berkahwin lagi? Kalau sekiranya kadi menegahnya, padahal perempuan itu reda diperisterikan maka jika ia pergi kepada jalan zina, siapakah yang akan bertanggungjawab?

Orang masing-masing bertanya adakah ini hendak diperundang-undangkan disebabkan Peguam Agung Kerajaan seorang Islam? Adakah dengan kerana ini perkara membuat hukum atas agama tidak perlu diminta nasihat Majlis Islam Penasihat Kerajaan? Inilah soal-soal yang rumit yang mustahak diperhatikan.

\* \* \*

Suatu Muktamar Alam Islami buat tenggara Asia, khabarnya, sedang diura-urakan di Persekutuan Tanah Melayu dengan memakan belanja sebanyak \$30,000. Di antara perkara-perkara yang dikemukakan ialah membebaskan faham-faham orang-orang beragama di antaranya membiarkan Qadiyani berjalan sebagaimana juga agama-agama Kristian di Malaya.

Sekali imbas ada baiknya tetapi kalau diperhatikan banyak merbahaya terutamanya meluluskan Qadiyani. Qadiyani tetap mengkafirkan orang-orang yang tidak mengikut kepadanya sedang Kristian tetap kafirnya. Qadiyani, menyeludup, sedang Kristian terang-terang. Kerana itu Muktamar seperti ini sangat-sangat mustahak diperhatikan oleh umat Islam kerana harus ada apa-apanya di belakang tujuan itu.

\* \* \*

Langkah pertama yang dibuat oleh kerajaan PETIR Singapura, apabila ia berkuasa ialah menghapuskan kebudayaan kuning. Dengan tidak memberi amaran kepada majalah-majalah atau akhbar-akhbar terus langkahannya diambil. Dengan itu orang-orang berharap bahawa Kementerian Kebudayaan akan lebih tegas bertindak. Apa yang disangka rupanya salah – dalam malam-malam kesenian yang diadakan dalam minggu taat setia nampaknya banyak

juga pertunjukan yang berpakaian hampir-hampir membuka dada (dari atas). Ada pula peraduan-peraduan pakaian baju Cheongsam yang menarik dari bawah ke atas sehingga hampir-hampir seluruh tepi paha terbuka. Kerana itu orang bertanya apakah yang bertulis sahaja yang diharamkan sedang yang tidak bertulis (yang ditunjukkan) tidak diharamkan dan tidak dipandang kebudayaan kuning? Tuan Rajaratnam harus dapat menjawabnya.



*Dalam lawatannya ke Persekutuan Tanah Melayu baharu-baharu ini, Perdana Menteri Australia, Tuan Menzies, telah berkunjung ke rumah Perdana Menteri Tengku Abdul Rahman di Kuala Lumpur. Gambar menunjukkan Tuan Menzies suami isteri sedang bercakap mesra dengan Maryam dan Sulaiman – (anak-anak Tengku), dengan diperhati oleh Tuan Krichely Pesuruhjaya Australia dan Tengku Abdul Rahman*